

رباعيات متفرقة

عامية وجميله
نرويها تروينا
تحقق أمانينا
تسعد ليالينا

سلم

أنا طير ح بعت سلام
طعمه لذيق أحلى كلام
سلام نبضة القلب أحلام
كلها رقه ومحبة و هيام

العيد

هجرت قلبي بدون مواعيد
الفكر بقي مكسور و قعيد
سألت قالوا سافر لبعيد
يمكن يرجع ويعود العيد

أنت الإلهام

الليل يا حبيبي أنت له قمره
أشعاري إلهامك ودا ثمره
أتمنى لقلبك يطول عمره
وتقولي الفرح جواه غمره

سلام

كل من مر و قال السلام أبدع
مرورك مرور العطر وأروع
أشوف في العيون نبضكم واسمع
قلبي يطرح للغير وعندكم يجمع

عيونك

إيه جرى لما عيونك من عيوني قربت
نظرة شوق عينيك وصلت القلب أثرت
داب من الشوق قلبي وروحي أتحيّرت
ولما غرقت بهواك نظرتك ليه أتغيرت

عيب

عامل قريب منى و تعمل حاجات خيبه
ولو في غنى عنى يبقى الغلط عيبه
دنيا غدارة ما تسوى فردة القديمة
عيش كريم وخلق نيتك للناس سليمة

سمك

يا ما جَرَى خلف الجدران
سمك بلا بحر أكله الحيتان
الكبير يأكل الصغير عادى
يا ويله بالآخرة من الرحمن

نجوم الظهر

العين بالعين خلي رمشك يناديه
لو حسيتي إنه مال ما تسألني فيه
تبقى نجوم الظهر شيفها بعينيه
لما يسأل قولي قلبي كدبت عليه

أعمل إيه

أنا الهاوي ليه التعقيد
ولا غاوي أروح لبعيد
وسايب لك حلاوة العيد
أهات روعي غير التنهيد

فنله 2

يبكى فنلة وقعت من الحبال
وجا يصرخ فسألوه قال
لو أنا بداخلها لمت فى الحال
يا عيني يا جحا عليك أقوال

العرافة

وجبت منها الأثر ورحت لعرافه
قالت لي معمول عمل ملفوف بلفافه
اللى يفكه بالصين أركب له نفائنه
قلت مش هسأل و دى كلها خرافه

*

البعد

مسيرها ترجع لقلبي وروحي شفافه
ورحت ليها فى يوم ما همنى مسافه
قالت أنا استنيتك و لدمعى جبت نشافه
مبلوله مانشفت البعد كان مننا هيافه

فرحه

أواجه و يفعل الله ما يريد
مش ها خاف من افكار معفنه
وبكره جاى اكيد ومش بعيد
يجيب لنا معاه الترحه ملونه

القطه

القطه المشمشية مسكت ديلها شويه
زعلت وجت عليا عضتني من أيديه
ماما ندهت عليا حاسب المره الجايه
ربطت بالشاش أديه إبعد عن الأذيه

الطمع

صدر دجاجة والصدّيقين
عائزين يقسموه مخـتلفين
كان الطمع باين بالعـيينين
خطفها قط سابهـم جوعانين

عذاب

أنا بحار مش لاقـي لي مرسـى
للقلب بعد طول العذاب يرسـى
وفرّح قلبي لـيه حبسـوه بالمنفى
العذاب سكن القلب أزاي أنسى

أرق

أرق أصابني من غرام
لوعة الشوق في الخصام
و جفوني جفت ولا بتنام
هجرني طيفه في الأحلام

وجع

يا قلبي قولت لي بخفه و دلّع
جوا عذاب والحبيب ما سمع
لو بجراءة بوحنا ولو بالوجع
كنا ارتحنا و فؤادي ما دمع

العين

الجميل فينا العين ب تبوح
اللسان خالي من الوضوح
القلب يتعذب ومش ب يبوح
لولا العين ما كانت جروح

خدك

أسمحي لي اليوم أغازلك
عيون مها يا جمال قدك
ربيع باهي غار من وردك
و نفسي أصبح على خدك

الأمل

الشمس بتبدد الغيوم
ليه تغرق بالهموم
و بالأمل قابل بكره
الحزن مش ح يدوم

